

A-il receu quelque faueur: Mon Dieu, dit-il, que i'ay receu de graces & de biens en ma vie fans vous en recognoistre: si ie n'auois la Foy ie ferois encore dans le mesme aueuglemēt que mes compatriotes: ils vous cognoissent assez pour blasphemer vostre sainct nom, mais pas encore assez pour vous benir: qu'ay je fait plus qu'eux pour que vous ayez voulu me preferer à eux? Je vous rends graces de tant de biens, aydez moy, mon Dieu, afin que iamais ne soit dit que vous ayez abandonné celuy qui se confie entierement en vous.

En effect sa confiance est aussi grande que sa foy: & Dieu nous a voulu monstrier qu'il l'agreed. Il y a quelques iours qu'une de ses petites niepces estant inquietée de terreurs qui luy prenoient dans son sommeil, & luy faisoient passer les nuicts dans des cris & frayeurs estranges: tous ceux de sa cabane se trouuerent [136] en grande peine, ne pouuant iuger autre chose sinon que quelque esprit malin tourmentoit ainsi cēt enfant: Ils auoient trop d'horreur du peché pour seulement songer à se seruir des danfes superstitieuses du pays, seuls remedes à ces fortes de maladies; mais ils n'auoient pas assez de confiance en Dieu pour esperer que la foy seule deuoit estre plus puissante en ce point que ces inuentions diaboliques: Le bon Ioseph se leue voyāt sa niece au plus fort de ces craintes; Non, non, dit-il, les diables ne feront pas les maistres en vne maison qui ne veut point auoir d'autre maistre que Dieu: si ce sont eux qui espouuantent cēt enfant, il faut resolument qu'ils cessent. Il prend la croix de son chapelet en la main, s'approche de l'enfant: Courage, luy dit-il, fouuiens toy que tu es baptisée, que tu n'es plus creature du